

每週經課朗誦經文(巴克禮漢羅/教羅)2014/06/22

共同經課 - 1

創世記二十一章八節~二十一節

8 Gín-á 漸漸大，就斷奶；以撒斷奶 ê 日，亞伯拉罕排設大筵席。9 當時埃及人夏甲 kā 亞伯拉罕所生 ê kiáⁿ teh 冷笑，hō 撒拉看見；10 就對亞伯拉罕講，Tiòh 趕出 chit-ê 奴婢 kap 伊 ê kiáⁿ；因為奴婢 ê kiáⁿ boē-thang kap 我 ê kiáⁿ 以撒同做後嗣。11 亞伯拉罕因為伊 ê kiáⁿ ê 緣故不止憂悶。12 上帝 kā 亞伯拉罕講，你 m̄-thang 為 tiòh chit-ê gín-á 以及你 ê 奴婢憂悶；見若撒拉對你講 ê，你 lóng tiòh 聽；因為 tui 以撒生 ê，chiah beh 稱做你 ê 後裔。13 論到奴婢 ê kiáⁿ，我亦 beh hō 伊成做一國，因為伊亦是你生 ê。14 亞伯拉罕早起來，thèh 餅 kap 一皮袋 ê 水 hō 夏甲；hē tī 伊 ê 肩頭頂；連 gín-á 續 kah 伊去；伊就去，到別士巴 ê 曠野就行無路。15 皮袋內 ê 水用了，夏甲就將 gín-á 放 tī 細叢樹腳。16 本身行開，約略射(chóh)一支箭 ê 遠，相對面 teh 坐；講，我不忍看 gín-á 死；就相對面坐，出聲大啼哭。17 上帝聽見 gín-á ê 聲；上帝 ê 使者 tui 天裡叫夏甲講，夏甲，你有甚麼 tai-chi? m̄免驚；上帝已經聽見 gín-á tī-hia ê 聲。18 起來，亦 hō gín-á 起來，牽 tī 你 ê 手；我 beh hō 伊成做大國。19 上帝開伊 ê 目矚，伊就看見水井；就將皮袋去入水到滿滿，續 hō gín-á lim。20 上帝 kap gín-á tī-teh，伊就漸漸大；tiàm-tī 曠野，成做射箭 ê 人。21 伊 khiā 起 tī Pa-lân ê 曠野；伊 ê 老母 tui 埃及地 kā 伊 chhoā 一個 bó。

共同經課 - 2

詩篇八十六篇一節~十節，十六節~十七節

1 大衛 ê 祈禱。1) 耶和華 ah，求你 aⁿ 耳孔聽我；因為我是困苦 sòng-hiong ê。2 求你保存我 ê 性命，因為我是虔誠 ê 人。我 ê 上帝 ah，你 ê 奴僕 oá 靠你；求你拯救伊。3 主 ah，求你憐憫我；因為我 thong 日求叫你。4 主 ah，求你 hō 你 ê 奴僕心歡喜；因為我用我 ê 心仰望你。5 主 ah，因為你是好，歡喜赦免人；有豐盛 ê 慈愛，賞賜凡若求叫你 ê 人。6 耶和華 ah，求你 aⁿ 耳孔聽我 ê 祈禱；Aⁿ 落聽我懇求 ê 聲。7 Tī 我患難 ê 日，beh 求叫你；你 beh 應我。8 主 ah，chiah-ê 上帝 ê 中間，無一個能比得你；你 ê 所做亦無 thang 比並。9 主 ah，你所造 ê 萬邦 lóng beh 來仆拜 tī 你 ê 面前；In 亦 beh 榮光你 ê 名。10 因為你做大，koh 行奇妙 ê 事；只有你是上帝。16 求你 oát 過來看我，可憐我；將你 ê 氣力賞賜你 ê 奴僕，救你 ê 奴婢 ê kiáⁿ。17 求你顯出恩典我 ê 憑據，Hō 怨恨我 ê 人看見來見笑；因為耶和華你幫贊我，安慰我。

or 詩篇十七篇

1 大衛 ê 祈禱。1) 耶和華 ah，求你聽公義，留心聽我 ê 求叫；我 ê 祈禱 m̄ 是 tui 奸詐 ê 嘴唇出；求你 aⁿ 耳孔來聽。2 願我 ê 判詞 tui 你 ê 面前發出，願你 ê 目矚鑒察正直。3 你已經試驗我 ê 心，你 tī 冥時鑒察我；你鍛鍊我，無 chhē-tiòh 甚麼；我立志，hō 我 ê 嘴無有過失。4 論到人 ê 行做，我 thàn 你所講 ê 話，家己謹守，無行強惡人 ê 路。5 我 ê 腳定定行你 ê 路，我 ê 腳 bē-bat 踏 chhū。6 上帝 ah，論到我，我 bat 求叫你，因為你 beh 應我；求你 aⁿ 耳孔聽我 ê 話。7 求你顯明你各樣 ê 仁慈，你是用 chiáⁿ 手救 oá 靠你 ê 人，脫離 hiah-ê 起來攻擊 in-ê。8 求你保護我親像保護目矚仁，將我蓋密 tī 你 ê 翼下。9 Hō 我脫離 hiah-ê 搶劫我 ê pháiⁿ 人，就是圍困我，beh 害我性命 ê 對敵。10 In hō 家己 ê 油包密；In ê 嘴講驕傲 ê 話。11 In 現在圍困阮 ê 腳步；In 注目 beh chhia 倒阮 tī 地裡。12 In 親像獅 siàu 想 beh 咬物；Koh 親像猛 ê 獅 á-thùn bih tī 暗密 ê 所在。13 耶和華 ah，求你起來，抵擋對敵；將伊打倒；用你 ê 刀救我 ê 性命脫離 pháiⁿ 人。14 耶和華 ah，用你 ê 手救我脫離世間人；脫離 hiah-ê tī 今生有福份 ê 世間人。你將你 ê 財寶充滿 in ê 腹肚；In 有 kiáⁿ 兒到心滿意足；將其餘 ê 財物留 hō in ê 嬰 á。15 論到我，我 beh tī 義 ê 中間看見你 ê 面；我睏醒 ê 時，看見你 ê 形容，就心滿意足。

共同經課 - 3

羅馬書第六章一節~十一節

1 總無長長 tiàm-tī 罪惡，hō 恩典加添 choē-choē mah? 2 斷斷 m̄-thang。咱 òng 罪 hit 面已經死 ê，kiám beh 猶原 tī 罪中來活 mah? 3 Kiám m̄ 知咱見若 bat 受洗禮來入 tī 基督耶穌 ê，是受洗禮來入伊 ê 死。4 所以咱既然 tui 洗禮來入 tī 死，kap 伊同埋葬；是親像基督 tui 父 ê 榮光 tui 死人中 koh 活，也 beh hō 咱 án-ni 行 tī 活命 ê 新款。5 因為咱若連合 tī 伊死 ê 款式，也 beh 連合 tī 伊 koh 活 ê 款式；6 是知咱舊 ê 人 kap 伊同釘，hō 罪 ê 體能廢棄，致到咱無 koh 做罪惡 ê 奴才。7 因為已經死 ê 是得 tiòh 稱做義，來脫離罪。8 Taⁿ 咱信若 kap 基督同死，就 beh kap 伊同活；9 知基督已經 tui 死人中 koh 活無 koh 死，死無 koh 管轄伊。10 因為伊 ê 死是 òng 罪做一 pái 死，伊 ê 活是 òng 上帝來活。11 Án-ni lín tiàm-tī 基督耶穌 tiòh 看家己 òng 罪是死，òng 上帝是活。

共同經課 - 4

馬太福音十章二十四節~三十九節

24 學生 boē poāⁿ 過先生，奴僕 boē poāⁿ 過主人。25 學生親像先生，奴僕親像主人，就夠額。人既然叫家主做 Piát-se-pok，何況叫伊家內 ê 人。26 所以莫得驚 in；因為無有蓋密後來無露出 ê 事；亦無有隱密後來無 hō 人知 ê。27 我 tī 暗中 kā lín 講 ê，lín tiòh tī 光明 ê 所在講出；aⁿ tī 耳孔 kā lín 講 ê，tiòh tī 厝頂傳伊。28 Hiah-ê 害死身軀，boē 害死靈魂 ê，莫得驚 in；獨獨 hit-ê 會滅靈魂 kap 身軀 tī 地獄 ê，khah tiòh 驚。29 兩隻雀鳥 á kiám m̄ 是賣一分銀 mah? 若 m̄ 是 lín ê 父有准，一隻亦 boē ka-láuh 地；30 就 lín ê 頭毛亦 lóng 計算。31 所以 lín 莫得驚；lín 比 choē-choē 雀鳥 á khah 貴氣。32 所以見若 tī 人 ê 面前認我 ê，我亦 tī 我 tī 天裡 ê 父 ê 面前 beh 認伊。33 見若 tī 人 ê 面前 m̄ 認我 ê，我亦 tī 我 tī 天裡 ê 父 ê 面前 beh m̄ 認伊。34 莫得 phah 算我來是 beh hō 地上和平；我來 m̄ 是 beh hō 伊和平，就是 hiat 落刀劍。35 因為我來，是 hō kiáⁿ kap 伊 ê 老父絕情，cha-bó-kiáⁿ kap 伊 ê 老母，sim-pū kap 伊 ê ta-ke，亦 beh án-ni。36 Koh 人 ê 對敵就是伊家己家內 ê 人。37 疼父母 khah 過頭 tī 疼我 ê，boē 堪得 tī 我；疼 kiáⁿ，cha-bó-kiáⁿ khah 過頭 tī 疼我 ê，boē 堪得 tī 我；38 m̄ 背家己 ê 十字架來 tè tī 我 ê 後面 ê，亦 boē 堪得 tī 我。39 得 tiòh 伊 ê 性命 ê 人，beh 失落伊；為 tiòh 我失落伊 ê 性命 ê 人，beh 得 tiòh 伊。